



L'importanta senda dal Quar chi exista daspè 100 ons.



FOTOS A. ZINI

Rolf Constantin, president da la secziun Pforzheim, e Cla Rauch da la cumischiun da la senda dal Quar.

Festagià la colliaziun da las regiuns vaschinas

■ (anr/az/fa) Grazcha a la senda dal Quar construida avant ün tschientiner sun gnüdas colliadas las regiuns Engiadina e Vnuost. Ils vaschins da tuot-tas duos varts dal cunfin han festagià quist'ouvra da pionier. In dumengia a bunura as vaivan miss in viadi dad üna vart glieud da l'Engiadina Bassa e da tschella glieud dal Vnuost. Il böt d'eira la chavorgia Quar in Uina Dadaint: Avant tschient ons as vaiva fabricchà üna senda i'l grip da quista chavorgia. L'iniziativa vaivan gnü ils commembers da la secziun Pforzheim dal Club Alpin Tudaish/Austriac cul sustegn dal cumün da Sent. Per commemorar quist'ouvra chi'd es gnüda inaugurada dal 1910 davu duos ons lavur vaiva organisà la cumischiun da la senda dal Quar üna gronda festa.

«D'importanza per tuot-tas duos regiuns»

Al nord da la chavorgia Quar ha Cla Rauch declerà ils pass da la planisaziun a

la realisaziun da las gallarias in Uina. Tant il capo cumünal da Sent Jon Carl Rauch sco eir la vicepresidenta da Damal Sybille Tschennet han manzunà la gronda importanza da quista colliaziun pels duos cumüns vaschins. Urs Wohler, il directur da l'Engiadina Scuol Turissem SA, ha intunà la relevanza da l'ouvra pel turissem regiunal. Gianna Rauch dal Club Alpin Svizzer ha rendü attent cha la Chamonna Lischana haja daplüs giasts grazcha a la senda dal Quar. Sco chi ha dit Andreas Pobitzer da la Chamonna Sessenna vala quai eir per quista chamonna. Preschaint a la festa d'eira eir üna delegaziun da la secziun da Pforzheim: «Grazcha a la senda dal Quar pudaina giodair eir la bellischma natüra in Val d'Uina», ha dit il president Rolf Constantin. Sper il bain dad Uina Dadaint ha il grond numer da preschaints giodü il giantar cumünaivel, accumpagnà cun la musica da la chapella UHU. Il silvicultur da Sent Mario Riatsch ha explicchà als interessats la chalchera be güst renovada.



A l'entrada nord da las gallarias s'ha radunada üna pruna glieud per tillas commemorar.



La populaziun d'Engiadina, dal Vnuost e da Pforzheim ha celebrà insembel la festa.



Mario Riatsch, silvicultur dal cumün da Sent, ha inaugerà la nouva chalchera in Uina Dadaint.



Gronds e pitschens han giodü la tyrolienne svolond sur il piazzal da festa via.



La chalchera in Uina Dadaint es gnüda renovada.